



მებატე გოგო



ილუსტრატორი
ელენა სელივანოვა



იყო და არა იყო რა, იყო ერთი ქვრივი დედოფალი, რომელსაც ულამაზესი ქალიშვილი ჰყავდა. ერთ დღეს დედოფალს პრინცესის ხელი შორეული ქვეყნის პრინცმა სთხოვა და ისიც დასთანხმდა.


დედამ ქალიშვილს მდიდრული მზითევი – ლამაზი კაბებით სავსე სკივრი და ოქროთი სავსე ზარდახშა – გაუმზადა; გამგზავრების დღეს კი პრინცესისთვის მსახურებს თავლიდან თეთრი რაში გამოაყვანინა. რაში ჯადოსნური იყო – ადამიანივით ლაპარაკობდა.



დამშვიდობებისას დედოფალმა თითში ქინძისთავი იჩხვლიტა, სამი წვეთი სისხლი ცხვირსახოცზე დააპკურა, ქალიშვილს გაუნოდა და უთხრა:

– თან წაილე. გაჭირვებაში გამოგადგება.

პრინცესა გამოემშვიდობა დედას, შეჯდა რაშზე და ერთი პირისფარემის თანხლებით შორეული ქვეყნისაკენ გაემურა.



ცხელი დღე იყო. პრინცესას ძალიან მოსწუროდა და წყაროს რომ მიადგნენ, პირისფარემს სთხოვა, ოქროს სასმისი წყლით ამივსეო.

– შენი მოახლე კი არ ვარ! – ცხვირი აიბზუა პირისფარემმა, – ჩამოდი ცხენიდან და აავსე!

პრინცესა გააოცა გოგოს უკმეხობამ, მაგრამ არაფერი უთქვამს. ცხენიდან ჩამოხტა და წყაროს წყალს დაენაფა.



ცოტა კიდევ რომ გაიარეს, პრინცესას ისევ მოსწუროდა და პირისფარემს სთხოვა, ოქროს სასმისი წყლით ამივსეო.

– შენი მოახლე კი არ ვარ! ჩამოდი ცხენიდან და აავსე! – განიშმატდა პირისფარემი.

პრინცესა ისევ გააოცა გოგოს თავხედობამ, მაგრამ ამჯერადაც არაფერი შეიმჩნია, ცხენიდან ჩამოხტა და წყაროს წყალს დაენაფა.

უცებ დედის ნაჩუქარი ცხვირსახოცი წყალში ჩაუვარდა.

„მშვენიერია! ცხვირსახოცი ველარაფერში დაეხმარება!“ – გაიფიქრა პირისფარემმა და პრინცესას დაემუქრა:

– ახლავე გამიცვალე კაბაც და ცხენიც, თორემ მოგკლავ! და იცოდე, ამიერიდან მე ვარ პრინცესა, შენ კი – მოახლე!



მათ ადგილები გაცვალეს და თეთრ რაშზე ამხედრებულმა ცრუ პრინცესამ ამაყად შეაბიჯა სასახლის ეზოში, ხოლო ნამდვილი პრინცესა რუხი ჯაგლაგით შეჩაქჩაქდა. ცრუ პრინცესას მეფე შეეგება და თავისი ვაჟი წარუდგინა.



უცებ მეფემ ნამდვილი პრინცესა დაინახა და მისი სილამაზითა და სინაზით მოიხიბლა.



– ვინ ხარ? – ჰკითხა გაოცებულმა მეფემ პრინცესას.

– მოახლედ მოვედი, მაგრამ აქ იმდენი მოახლეა, რომ ჩემი ადგილი აღარ არის, – ამოიოხრა პრინცესამ.

– მებატე მჭირდება, – შესთავაზა მეფემ და პრინცესას საბატისაკენ გაუძღვა.

საბატეში მებატე კირსტენი დახვდათ. სწორედ მას დაავალა მეფემ, შეეკედლებინა ნამდვილი პრინცესა.

